

Luk Aot

Blong ol Lida



Luk Aot Blong ol Lida

Yu save se ikat wan loa we oli singaotem Kovensen blong olgeta Raet blong ol Pikinini? Wan kovensen hemi wan agrimen bitwin fulap kantri blong oli sapotem nomo wan loa. Taem wan gavman blong wan kantri hemi ratifaem wan konvensen, hemi minim se kantri ia hemi agri blong i folem ol loa we oli stap insaed long konvensen ia. Ol raet blong ol pikinini hemi abaot wanem nao ol pikinini oli alao blong mekem, mo wanem nao ol man we oli stap lukaotem ol pikinini oli mas mekem blong mekem sua se ol pikinini oli hapi, hetti mo sef oltaem. Ol pikinini tu oli kat responsabiliti long ol narafala pikinini mo tu long ol bigfala man.

Kovensen ia hemi se wanem?

- Ol pikinini oli kat raet blong ikwaliti nomata wanem res, kala, nijjen, seks o wea oli kam long hem
- Maen mo body blong olgeta hem i hetti mo i develop gud
- Oli stap long wan gudfala haos, oli karem inaf kakai mo oli kasem gudfala medikal kea
- Sapos oli handikap, oli karem spesel kea
- Oli karem lav, andastanding mo kea
- Oli kasem fri edukesen, mo oli save pleiplei
- Taem blong ol disasta, oli kasem help kwiktaem
- Oli kasem proteksen long ol fasin blong lego ol pikinini, blong mekem nogud olgeta mo blong jusum nogud olgeta
- Oli kasem proteksen long persikusen mo blong oli kro bigwan long wan spirit blong pis.



Hao nao hemia i afektem mi mo olgeta pikinini blong me?

Vanuatu hemi ratifaem finis Kovensen blong olgeta Raet blong ol Pikinini. Hemia i minim se ol pikinini blong yu ol shud kat finis ol raet we oli stap long Konvensen ia. Hemi minim tu se yu olsem wan papa o wan mama, mo olsem wan gadien, yu nao yu mas givim fastaem kea, gaedens mo sapos igo long ol pikinini blong yu. Kavman hemi blong helpem yu blong yu lukaotem ol pikinini blong yu blong mekem se oli hetti hapi mo sef.

Wanem nao mi save mekem blong ol pikinini blong mi oli kasem ol raet blong olgeta?

Yu mas mekem sua se vot blong yu long ileksen ia hemi kaont mo yu mas askem ol lida blong yu wanem nao bae oli mekem blong ol pikinini blong yu. Yu save mekem sua se ol lida we yu jusum oli kat ol polisi wetem ol prokram we oli blong ol pikinini. Blong helpem yu blong yu save finem aot wij wan lida nao bae hemi save mekem ol samting blong ol pikinini blong yu, mifala i kat sam kwesten we bae yu save askem long ol lida long ol raet blong ol pikinini wetem ol woman. Be ino hemianomo. Yu mas mekem suase ol lida we yu jusum, oli folem ol promes blong olgeta we oli mekem blong ol pikinini blong yu.



1. Wanem nao yu save talem long mi abaot andastanding blong kavman blong yu long Kovensen blong olgeta Raet blong ol Pikinini?
2. Wanem nao yu save talem long me abaot andastanding blong kavman blong yu long Kovensen blong Stopem evri fom blong Diskriminesen Agensem ol Woman?
3. Yu save long olgeta problem mo isiu we ol pikinini blong Vanuatu oli fesem tedei long ol komiuniti blong yumi?
4. Kavman blong fastaem hemi mekem wanem finis blong mekem gud situesen blong ol pikinini mo ol woman blong Vanuatu?
5. Sapos oli ilektem yu, bae yu mekem wanem long olgeta isiu blong ol pikinini mo ol woman?
6. Wanem nao hemi mekem yu yu wan lida we bae yu save lukaotem olgeta pikinini?

